

EARLY LEARNING CURRICULUM FRAMEWORK | HE ANGA MARAU KŌHUNGAHUNGA 2023

Part C

Ngā Kaupapa Whakahaere mō Te Kōhanga Reo

Whakamana Mā Te Whāriki a te Kōhanga Reo e whakatō te kaha ki roto i te mokopuna ki te ako, kia pakari ai tana tipu.	Kotahitanga Mā Te Whāriki a te Kōhanga Reo e whakaata te kotahitanga o ngā whakahaere katoa mō te ako a te mokopuna, mō te tipu o te mokopuna.	Whānau – Tangata Me whiri mai te whānau, te hapū, te iwi, me tauiiwi, me ō rātou wāhi nohonga ki roto i te whāriki o te kōhanga reo, hei awhina, hei tautoko i te akoranga, i te whakatipuranga o te mokopuna.	Ngā Honotanga Mā roto i ngā piringa, i ngā whakahaere i waenganui o te mokopuna me te katoa, e whakatō te kaha ki roto i te mokopuna ki te ako.
--	--	--	---

Ngā Taumata Whakahirahira mō Te Kōhanga Reo

Mana Atua Kia mōhio ki te whakapono, wairua, aroha, manaaki, whakakoakoa, whakahirahira.	Mana Whenua Kia mōhio ki ōna tūrangawaewae, ki ōna marae, ki ngā pepeha o ōna iwi. Kia mōhio ki te mana o ngā awa, whenua, o ngā maunga. Kia mōhio ki te manaaki, ki te tiaki i te whenua.	Mana Tangata Kia mōhio ki ōna whakapapa, ki te pātahi o te whānau, ki ōna hoa, whānau whānui; kia mōhio ki ōna kaumātua; kia mōhio ki a Ranginui raua ko Papatūānuku.	Mana Reo Kia mōhio i te rangatiratanga, i te tapu me te noa o tōna ake reo. Kia matatau te tamaiti ki te whakahua i te kupu. Kia mōhio ki tōna ao, te ao Māori.	Mana Aotūroa Kia mōhio he wairua to ngā mea katoa; te whenua, te moana, te ao whānui, ngā whetu, te hau, ngā rakau, ngā ngāngara.
--	--	---	---	---

Te Tauira Whāriki (Te Katoa o te Mokopuna) mō Te Kōhanga Reo

Kei te whānau, hapū, lwi te mana kawenga mō te whakapakari i te whaioranga tinana, wairua, hinengaro me te whatumanawa o ia mokopuna, kia pakari ai ki te toro atu ki te pumautanga o tona Ao Māori.

Tinana Ko tēnei wehenga e hāngai ana ki te tipuranga me te whakapakaritanga o te tinana. Whakairatia ana te mokopuna, tīmata ana ngā whakahaere hauora mō te whakatipu i a ia me te whakapakari i a rāua ko tōna whaea. Kia tika, kia eke hoki ngā kai ka whāngaihia ki a rāua. Kia manawanui ki te atawhai, ki te whakaruru i te mokopuna i ngā wā katoa nō te mea he nui ngā mokopuna ka whara i mua i te rua tau. Nā reira kia mataara tātou. Me ako i te mokopuna i runga i te ngākau hari me te ngākau hūmārie, kia tino pakari ai te hauora o tōna tinana. Kia kaha te whakahau i a ia ki te hīkoi, ki te omaoma, ki te purei paoro, ki te pikipiki. Mahia ngā whakakoringa tinana ka taea e ia. Kia mōhio te mokopuna ki ngā wāhi o tōna tinana me ngā mahi ka taea e aua wāhi, ka mutu, kia mā katoa ngā whakahaere mōna me ngā mahi whakaako i a ia. Tua atu i ēnei kia mau ki ngā akoranga o te ao tawhito mō ngā tikanga, ngā rongoā me ngā kai ka pai māna. Kia kaha hoki te whakaū i ngā tohutohu o te ao hou mō te orange tinana o te mokopuna. Ko ngā whakahaere mō ngā mokopuna kia hāngai ki a rātou, ā, kia eke ki ngā mahi ka taea e rātou. Heoi kia maumahara, he nui ngā rerekētanga kei waenganui i tēnā reanga, i tēnā reanga, ā, he nui hoki ngā rerekētanga kei waenganui i tēnā mokopuna, i tēnā mokopuna. He mana motuhake tonu tō tēnā, tō tēnā.	Wairua Ko tēnei wehenga e hāngai ana ki te pakaritanga o te wairua me tōna hononga ki te taiao. Ka ako te tamaiti, he ōrite te āhua o ngā mea katoa o te taiao; ko te kiko o ngā mea katoa he ōrite te pūngao. Ka wānanga mō ngā atua, me ō rātou tūranga i roto i te taiao. Ka hoki ki ngā tikanga o mua, ki ngā whakapono, ngā kohinga whakaaro me ngā kitenga o te ao tawhito. Ka kimihia hoki ngā karakia, ngā mōteatea me ngā whakatauki e hāngai ana. Ka wānangatia ngā mātauranga o te ao hou; te pūtaiao me ōna hononga, te hunga tāngata me ōna tini āhuatanga, tae atu ki te moana me ngā whetū. He ōrite te pūngao o ēnei mea katoa.
Hinengaro Ko tēnei wehenga e hāngai ana ki te pakaritanga o te hinengaro. Ka ako te tamaiti i te āhuatanga o tēnei mea o te whakaaro, arā, ko te pupuri i te mana o roto tonu i a ia, me te mana o te ao whānui. Ka ako i ētahi tikanga hei whakaū i ngā momo whakapono e pakari kē atu ai te hinengaro. Ka ako i ngā whakamārama a te ao Māori tawhito, mō te taiao, mō te pō me Te Kore. Ka ako i ngā whakamārama a te ao hou mō te orokohanga o te ao; tōna āhua i ngā wā o mua me tōna āhua ināianei. Ka tirohia te hāngai o tēnei whakapapa ki te tamaiti, arā, ki tōna whānautanga me tōna tipuranga ki tēnei ao. I ngā wā o mua, ko te karakia me te mōteatea ngā taonga i kaha whāia hei kawē i ngā tūmanako o te hinengaro Māori. Ko te whakapono, mā te karakia e titi ai ki te hinengaro me te ngākau o te tangata, ngā hiahia kei roto i a ia – hei tauira, ko te hiahia kia āwhina i tētahi atu, i a ia tonu rānei; ko te hiahia kia whai i tētahi mahi, i tētahi taumata rānei. Ko ngā karakia nei, he rite tonu ki ngā karakia mō te whakatō kūmara i ngā wā o mua, inā hoki, he whakaūnga noa iho ēnā i ngā hiahia o te tangata, kia makuru ai te kūmara i te tau. Nō reira, kotahi tonu te whāinga o ngā karakia katoa, arā, kia manaakitia mai ngā hiahia o te tangata, ahakoa ko wai te atua, ko Ihu Karaiti, ko te Atua, ko Io Matua Kore rānei.	Whatumanawa Ko tēnei wehenga e hāngai ana ki te pakaritanga o te whatumanawa. Ka ako te mokopuna i ngā whakaputanga huhua o tēnei mea o te whatumanawa, mai i te aroha me te harikoa, ki te ngākau kino me te ngākau hinapouri. Ko ēnei āhuatanga o te whatumanawa e whakaatu ana i te āhua o roto i te tinana. Ki te ora te whatumanawa, ka ora te tinana. Ki te tūkinotia te whatumanawa, ka hē katoa te tinana. Nō reira, inā tau ngā wāhanga katoa o te ngākau o te mokopuna, ka tipu ia i runga i te ngākau harikoa, ka tū māia, ka tū kaha hoki ā roto tonu i a ia.

Dated at Wellington this 21st day of April 2023.

Hon JAN TINETTI, Minister of Education.